

Von vormugen des Ablas

Bodenstein, Andreas

Vorwort

Wieder einmal ging ein Jahr vorüber, und wir befinden uns im Jahr 2021 – nach einem sehr chaotischen Jahr geht es weiter.

Dieses Jahr hat uns allen eine Menge abverlangt – doch Gott hat uns hindurchgetragen.

Für mich persönlich bot die Zeit, die ich gewonnen habe, die Gelegenheit, einige neue Bücher zu erstellen. Gleichzeitig überarbeite ich viele der alten Bücher, sei es, um Fehler zu beheben oder neue Inhalte hinzuzufügen.

Vielleicht hat aber auch der eine oder die andere Lust, mitzumachen und neue Bücher zu erstellen – spricht mich einfach an.

Euch allen wünsche ich Gottes reichen Segen und dass Ihr für Euch interessante Texte hier findet. Für Anregungen bin ich immer dankbar.

Gruß & Segen,

Andreas

Bodenstein, Andreas - Von vormugen des Ablas.

Orig. Von vormugen des Ablas. wider bruder Franciscus Seyler parfuser ordens Andres Carolstat Doct.

Allen vnd iglichen. die diszes buchlin/ sehen oder hören/ leßen/ Empiet ich Andres Botenstein von Carolstat meynen dienst.

Es seynt tzween brüder parfußer ordens/ nemlich bruder Franciscur Seyler/ der sich ein vnuordienten Gardian/ in dem scheynbarlichen kloster/ auff sant Anneberg/ sschreybt/ vnd Johan Forchem/ Vice Gardian daselbst/ ym predigstull/ der tzu vorkündung gottes wort vnd warheyt auffgericht/ gestanden/ vnd haben gesagt/ man sol sich nit keren an die newen propheten/ die den Ablas in tzweyffel setzen/ aber vntuglich schatzen/ dan die selben/ seynd vorführer des volckt/ Disse brüder haben vns Wittenberger öffentlich/ vnd teutlich/ in ob angetzeygter stel/ genant/ vnd vor dem hauffen Christlicher menschen/ als solche Propheten/ die Christo/ sein tewer gewonnen volck/ vorleyden/ mit starckem vnd freyhen geschrey vor vrteylt.

Weyll ich dna/ die tzyt doselbst gewest vnd treffelicher vorletzet vnd verleumbt. Auch mich schuldig erken/ der berumpten Vniuersithet Wittenbergk/ eher/ preyß/ lob vnd nutz/ zu halten/ vnd nach vormügen zuuordeten. Wie woll ich yhe vnd ye mich bevlissen hab/ gar wenig/ oder nichts/ gegen dem Ablas zusagen/ Doch dringen mich die heyligen grohanmunchen vn vorgunden mir/ das ich stil schweyg/ dann sie obgenante Vniuersteet/ der glidmaß ich byn/ hochlich vorletzen/ vnd mich/ tzusampe der Vniuersitet handeln/ als solt ich/ eyn solcher prophet sein/ der das volck gottes/ mit falscher leer/ gar abtziehe/ vnd in eynen affter glauben füre.

Nun geb ich yglichem zu erkennen ob ich schweygen dürff/ die weylvns allen gebürt/ wider bedriegische propheten auffzusteem/ schweyg ich/ ßo wirt/ graß vnd laub/ holtz vnd stein/ hymel vnd erdtrich/ ym Jungsten gericht gottes schreyhen/ vnd clagen/ das ich mich/ nit hab lassen leeren/ in sunderheit/ das ich/ die schefflin gottes/ mutwillig durch falsch leer vorleydet.

Derhalben hab ichs von nöten geacht/ eyling/ abberumpten brüdern/ zuuor an/ dem vnuordienten Gardian/ zufragen/ ob der ablas/ de iure diuino sey/ das ist/ ab die heylige schrift clar außsag/ das der Ablasw/ nach inhalt gottliches worts/ was vormug/ vnd ob der selb/ als ein mittel oder tzeychen/ zuuorgebung der sunden/ zu suchen sey/ das soll in dißem buchlin von dem

heyiligen bruder gefragt werden. Aber von yhrem rosenkrantz/ vnd hültze-
rein boßkaulen/ welche sie an cleyn taffelin vnd kirchduren hefften vnd pa-
terlogia nennen/ wil ich in aynem andern buch schreyben.

Itzt frage ich lieber bruder Seyler vnd bitt/ wellest mir eyenn schrift antzey-
gen darauß ich lernen mug was ablas sey. Vnd damit wir/ nit zwu meynung/
vnder eynem wort/ hynn vnd her bewegen. Soll das ein grund sey/ durch die
heyilige schrift/ vorstee ich keyn ander/ denn die/ in der Biblien/ als Cano-
nica vnd Catholica von allen angenommen ist/ darumb darffstu mir keyn
menschen gesetz furwerffen/ mich damit zupinden.

Der ander grund ist/ wir fragen hie nit/ ob ablas in der schrift gegrundet sey/
der ewige schuldt vnd peyn/ abnympt/ dann alle ablas bullen/ behalten zu-
uor/ das ein yglicher/ der ablas teyllhafftig seyn will/ der soll tzuuor/ rew
vnd leyd/ vber sein sunde gehabt vnd vorgebung ewiger schuldt vnd peyn
erlangt haben.

Darumb begeer ich von dir zu lernen/ du wollest mir/ deynen ablas/ den du
predigest/ auß der schrift beweren vnd war machen/ das du ein rechter pro-
phet seyst/ der die warheyt leer/ vnd wir Wittenberger wider das wort gottis
geprediget.

Die vormeynte weyßen propheten/ welche mit tonner vnnd plitz/ wider vns
Wittenberger brassen/ sagen alßo von dem Ablas.

Ablas nybt nit ab/ die ewige schuldt/ das ist/ die sund/ da durch eyner gott
ewiglich ertzurnet/ vnd ewig straff leyden soll/ betzalt auch nit vnuorgenck-
lich peyn vnd leyden. Dan das kan gott allein in seinyem namen vnd wirck-
lich/ vnd kein creatur ym hymelreych oder erdtrich/ darumb gott durch
Esaia im 43. c. spricht. Ich byn der/ der die sunden vorgibt/ vnd gedenck
yr nicht mehr/ alßo vorgibt gott/ auß gnaden/ schuldt vnnd straff/ der wegen
auch geschrieben. Als offt der sunder vber seyne sund seufftetzet/ ßo offt
mals werden ym seyn mißßhendlung vorgeben. Nun wan goth die sund nit
strafft/ ßo vergiesset er der sunden/ alßo wirt ewig peyn vnd schuld allein
durch gott gnediglich abgenommen. Ewig schuldt vnd straff/ ßo eyn vber
farer gotlichs gesetzes zu leyden schuldig seyndt zwey ding/ welche der ab-
las nit hynn wegk kan nhemen wie dan die parfüßer Monichen/ durch Alex-
ander Heylisch vnd andere ablas prediger zugeben vnd bekennen.

Das drit dingk/ dz ablas hinweg nympt ist bey den gemelten lerern vnder-
schieden. Dan etzliche sagen/ das ablas/ die straff vnd peyn ablesset/ die der
priester/ dem eynfeltigen schefflein auff leget/ vnd dartzu er den beychtsohn
vorpflichtet. Die selbe peyn/ pflegen etzliche beycht vetter/ den sundern/
baldt nach gethaner beycht/ vnd vor der absolution auff zusetzen.

Aber etzliche ablas lober/ sagen das ablas/ den mangel vnd gebrechen ab-
nem/ welchen eyner hat/ wan er sein puß oder peyn/ vnd gottis gebott/ in
cleyner lieb efult. Aber dise meynung/ ist von wenig predigem angenom-
men derhalben ich zu der erste opinion kere.

Nym ein exempel/ von zeytlicher peyn vnd puße/ dartzu die monich/ die
beychkinder vorpinden/ wan du gebeycht hast/ szo spricht der beychtvatter/
du solst ij tag wochenlich fasten/ vnd er nennet dyr ein zeyt langk/ aber du
solst rosenkrentz beten.

Aber iij pfundt wachs in ein kirchen geben/ aber xx messen im parfußer
kloster lassen haltden/ vnd fur ein messe/ ein groschen kuchenspeyß kauf-
fen/ dan wir monich seindt heylicher dan weltliche pfaffen/ wir geen auff
holtzschugen/ vnd trincken auß keynem tzyne gefeß/ wie wir dan alle wis-
sen/ das vnser beycht vetter aygen nutz vnd gedeyen suchen/ vnd loben ire
heylickeit/ wie ein kauffman/ sein ware preyset wann er gern gelt erkauffen
wil. Etzliche beschweren/ die beicht kinder mit gebewh/ vnd andere pey-
nen/ die sie zeytlich straff oder peyn nennen/ dere ich itze geschweyg/ da-
mit ich den vnuordienten Gardian auffweeck.

Endlich der Gardian vnd etzlich sein anhenger sprechen/ dz der ablas/ sol-
che peyn die/ der priester dem beycht kindt an halsz henckt/ abpindt/ vnnd
rathenn iren zu hörern/ sie sollenn sich/ die Wittenbergische propheten/ nit
lassen vorfuren/ vnd predigen offentlich/ der ablas sey in der heylige schrift
gegrundet vnd begriffen.

Ich wil fur mein cleyneyt bekennen/ das vil grunde heylicher schrift noch
nit angerürt/ ich schweyg erlernet hab/ weyß auch woll/ das meynere gley-
chen nit wenig seynd/ welche die schrift tag vnd nacht ym hertzen betrach-
ten/ vnd doch den ablas nit gefunden haben/ sunderlich die kleyn achtung
thun/ wie sie das gelt/ durch leerung/ den leutten auß ym beuttel brengen.
Weyl aber obgenanter bruder Seyler an statt gots/ vnd in der stelh/ do man
alleyn gottlich warheyt vorkundigen soll/ offentlich gestanden vnd außge-
sagt/ die Wittenbergische propheten sein got vnd der schrift/ wie oben be-

rürt/ endgegen vnnd tzu wider/ Hab ich durch die brüder/ gedachtem bruder Francisco entpotten ich wöl yhm meynen gruß von Wittenberg zu schicken/ in meynung etwas von yhm/ das mir noch vnbewust zu begreyffen.

Das ist yhm gar vngefellig gewest/ derwegen hab ich von stunden an sein vngekochten stichling empfangen. Vnder andern schreybt der Seyler alßo/ Soll man schweygen/ wan etzliche offenbarlich irren/ auff das/ das volck vorfürt vnd betrogen wirt? Dißer frage antwort der Seyler selbst/ das sie fernn von vns/ wir wollen nit hunde sein/ die nit bellen können.

Hatt nicht lieber bruder Francisce/ meyn doctor Martinus villmals begert er wülde sich gern/ durch die schriftt lasse weyßen? Des gleychen byn ich noch erpütig/ von eynem vnigelarten kindlein zu lernen/ das mich von irrungen abfüren vnd vnder richt magk/ ich geschweych/ das mir wider seyn solt/ von eynem zu lernen/ der eyn seyl 40 iar vmb den nabel gegurt/ vnd den Psalter außwendig syngen kan. Behütt mich der barmhertzige gott/ das ich fursetziglich/ meynem grösten feyndt/ ein yrrisch leer eingebe/ was darffstu dan/ Seyler/ vber die Wittenbergisch/ in gemeyn schreyhen/ als wider die gene/ die durch yrthumb das volck betrieben. Du zelest dich mit den hunden der schriftt/ Nu bistu nit ein schwirmischer oder irrischer hund/ den die hundßfliegen vnd gelt saugen beyssen/ ßo bylle vnd schrey vns/ ein geschrey/ auß der heylige schriftt/ vnd leer mich/ dan ich begere auß herten zu wissen/ das der ablas deiure biuino eingesetzt/ das ist in der heylige schriftt eingeleybte sey.

Ich hoff auch/ meyn Seyler/ du werdest mir ein dapffere schutzred schicken/ dan du auff S. Annebergk gethan hast. Du sprachst/ frage dein Seniores vnnd ßo werden sie dich berichten/ ich meyn du hettest bereyht die pfeuffen auß dem hundtsmaull verloren/ dan werestu/ ein hundt gewest/ der bellen kan/ du hettest antzweyffel/ mit der schriftt gebollen/ du weytest mich aber zu doctor Ecken/ der mir hochlich vordechtig/ als eynder der selber nit vill kan/ vnd meyn feyndt ist/ du hast gehört das ich eyn schriftt wil haben/ ich hab keyn zweyffel/ das vil Bebst vnd vil menogen vom Ablas geschrieben/ dan wo es dinlich were/ ich wülde dich wol in die schul füren/ aber ich lerne teglich/ dz den Chresten allen vnd yglichen/ er sey Babst/ Bischoff/ geystlich oder weltlich/ klein oder groß/ hoch oder nyder/ die heylig schriftt/ wie ein tryfeltiger strick/ den niemants zu reyssen kan/ fur gegeben/ auß der selbe vorständige/ mich wol vnd recht/ Was darffstu mich zu menschen weyßen/ fure vns in die schriftt leer vns durch gottliche schriftt.

Du sagest auch du wöllest sicherer seyn/ szo du/ den fußstapffen der alten vetter nach folgest. Hie wolt ich gern die selbe heylige vetter hörn/ zum andern dir ffrucken/ das Augustinus geschrieben/ Sprechende. Ich gebe allein/ den schrifften/ die man Cononica oder Catholicas/ das ist gemeynlich biblische genent/ Diß lob vnd preyß/ das yhrer keyner geyrret hab/ vnnd glaube/ alles das sie sagen/ ob ichs gleych nit vorstehe/ aber alle andere/ sie seyn heylig oder gelärt/ leeße ich alßo/ das ich sie fur menschen achte/ die irren können/ ich glaub auch ynen nit/ das sie recht vnd wolgeschrieben/ das sie alßo geschrieben vnd gemeint haben/ es sey dan/ das sie durch heylige schrift aber beweglich vrsachen/ yhr bücher befestiget haben.

Die rechten alt vetter haben ein vordrieß/ das yhr bücher/ der heyligen schrift gleych gewirdert werden/Wie Augusti. sagt. Noli meis. Was darffstu nun/ mit deynem Bonauentura/ Schoto/ Fancisco Marenis/ Dorbellis vnd andern schulvettern groß geschrey machen/ muglich ist es/ das sie alle geirret vnd blind gewest/ vnd das/ der yn nach geeth/ mit yhnen in die gruben fall. Wiewol mir das alles von vnnöten zusagen/ dan ich beger noch/ du wollest mir schrifften brengen/ da durch du vns Wittenberger/ zu falschen propheten kanst machen.

Bruder Seyler der vnuordient Gardian/ begegnet mir ferner mit eyner meysterliche gegen redt/ dan er schreybt also. Ich zweyffell nit/ das der doctor mehr glaub/ dan in den heyligen buchern geschrieben ist.

Jaa lieber Seyler ich glaub/ das die parfuß monich gern gelt haben/ ob sie gelt nit antasten/ das ist nit geschrieben in Biblien es ist auch vormutlich zu glauben/ das sie in groben kappen hoffertig/ vnd tzeyten gelt in holtzschuhnen tragen/ vnd treten/ das sie nit dorffen angreyffen/ ich gebe dir nerrisch exempel/ vnd ein questenn/ wie du ein badt man bist/ hettestu dich furgessen/ vnd vnterlassen zu fragen/ ob ich an vatter vnd mutter geborn sey/ ßo wolte ich dir auch fruntlicher geantwort haben.

Nu muß ich dich weyter furen/ vnd dohynt/ do du vngern ferest/ ist es nit/ das die Teuffel glauben vnt tzittern/ es glauben auch vill holzschuger vnd hilfft sie nit. Ich glaub das Paryß ein grosse stadt ist/ vnd glaub das die Theologen etzliche tzu Louanien grob gesellen seint/ aber wz dient vns solcher glaub.

Kurtzlich ich kan nit schweygen/ das du zumal vngelart in der heyligen schrift bist/ dan so du gewist hettest/ was gesagt ist/ ich glaub der heylige

schrift/ aber ich glaub dem wort gottis du hettest gewißlich anders gebollen vnd geschrieen/ was aber der glaub ist/ wil ich/ beystendig gottlicher eyngebung/ in kurtzen schreyben/ ym Buchlein vom glauben vnd wercken des gerechten.

Doch soll eyn ytzlicher Christglaubiger wissen/ das in dyßem falh/ do wir von handeln/ nemlich von vorheyschung/ das dem sunder schuldt vnd peyn vorgeben vnd abgenommen soll werden/ das wir keynem wort oder geschriften glauben sollen/ dan gottis wort oder schrift/ darumb sprich ich recht/ ich glaub keyner vorheyschung vnd vorgebung der sunden/ den die in der heylige Biblie außgedruckt aber begryffen ist/ gott der vorgibt allein/ in seynem nomen/ sunden/ got vorheysset auch allein vorgebung der sunden. Es soll auch niemants am wort gottis zweyffeln/ auch soll ein yglicher geyst/ durch gottliches wort in gott hangen vnd kleben/ festiglich glauben/ das er die creatur sey/ der gott vorheyscheit/ vnd helffen wil/ darumb sagt Christ zu tzwen blinden/ muget yr glauben, das ich euch sehende machen kan. Also von dem glauben zu reden/ sag ich frey/ das ich keynem andern wort/ keyner andere schrift/ keynem andern Euangelio glaub/ dan das die heylige Bibel inheldet/ ich getraw auch keyner erlöbung/ meiner Seel. sie sey dan in der schrift beschlossen. Hieremias spricht im 17. cap. Vormaledeyet ist der/ in menschen glaubt/ hafft/ aber getrawet/ vnd sein hertz von gott abweychet/ darumb sollen wir allein gottlichen zusagen vnnnd vorheyschigung glauben/ getrawen/ vnd annemen/ wan bruder Seyler vorstanden het/ wie das wort gottis sol geprediget werden/ ßo hett er woll geschwigen. Weyl sie dan ablas/ ein vorheyschung/ sunde oder peyn zuuorgeben/ nennen/ ßo muß von nöten/ ein Euangelische vorheyschung sein/ in der heyligen Biblien begryffen/ sunst sol niemants/ an ablas glauben.

Ferner denet der Seyler seynen strick/ vnd schreybet/ ich solle ym/ in dem Euangelio oder Paulo weysen/ das ablas forbotten sey. Diße wort nehm ich mit bedingung an/ das ich sie gebrauchen will/ wider den vngelarten Seyler/ mit einfurung/ der Absolution/ so von Christo bescheen seint.

Aber dißmal sprech/ das Moiseß/ zu welchem Christus weyset/ geschriben hatt/ das man nicht/ zu dem gesetz gottis hencken oder setzen soll/ man sol auch gar nichts da von nemen/ ya also ist die heylige Biblien betzeundt vnnnd bewart/ das der in hochste vormaledeyhung fellet/ der an das gegeben Euangelium prediget/ als Paulus ad Gala. 1. schreybt. si quis preter id/ quod nobis Euangelizatum est rc. er sage nit/ welcher wider die gute vnd trostli-

che zusagung oder vorheyschung gottis leret/ der sol in die acht oder übers-
ten Ban gefallen/ sonder er spricht also/ welcher anders prediget rc. Wiltu
nu ablas loben/ als ein zusag/ vorgebung der peyn oder der schuldt/ ßo ist
dir/ als eynem prediger/ von noten/ clar zu tewten/ wo dein vorheyschung
geschrieben steet.

Am letzten/ vorhönet mich bruder Seyler mit solcher frag. Sol man nit glau-
ben/ aber in der kirchen thun/ da dz in der heyligen schrift geschrieben ist/
wie kumpt es/ dz man wasser vnd saltz weyhet.

Auff dissen gegenwurff gehoret ein klein buchlein/ dz wil ich dem bruder
auch bald schicken/ vnd nennen/ vom geweychten wasser/ wider bruder
Seyler.

Das er aber meldet/ man thue vil in der kirchen/ das in der schrift nit anget-
zeygt/ gesteen ich ym/ als wie man hundert außiagen soll/ vnd die holtz-
schuch vnd nider cleyeder in der parfüßer sacristen ordenlich leben/ vnd
sich alßo zu der meß/ bereyten/ man hilfft auch den kertzen das sie nit
schmelzen/ vnd thut desgleychen vil/ das spotlich zu schreyben.

Das seint des/ bruder Seylers helffred/ ich hoff er werdt hinfur bessere leer
an tag brengen/ damit ich aber auch etwas von dem Ablas sage/ sol diser
beschluß gesetzt sein.

Wan gott dem sunder/ sund/ schuld/ vnd peyn vorgibt/ ßo bleybet nit meer/
das der mensch schuldig ist zuthun/ dan daß/ daran vorgebung der sunde
hanget vnd steet. Das ist/ wan gott/ dem menschen/ sund vorgibt/ ßo bleybt
allein das/ darin vorgebung/ der sunde/ steet/ das magk kein Engel oder
beychatter abnemen/ dan als bald/ der auß wircket/ von dem selben abtriet/
ßo kummen die sund wider.

Mocht yemants fragen/ was ist das selbe/ dem vorgebung der sunde/ alßo
innerlich vnd wesentlich eingebilt ist. Dartzu antwort ich/ das ist/ das vns
Christus zu eyner person gesagt/ gan hyn/ vnd sundige nit mehr/ in dem
steet vorgebung vnd außtilgung der sunde/ gehn von bößem aygen willen/
stee nit still/ sondern gahn/ vnd sundige nit. welcher in dißem sententz
bleybt wirt an ablas wol selig/ dan in dem wesen sterben sunde/ vnd lebet
der geyst/ nym das wesen hin wegk/ ßo wirstu sehen/ oder auß der schrift
lernen/ das vorigen sunde wider wachsen.

Das hat vns Christus geleert/ durch das gekert hauß/ außß dem der Teuffell voriagt/ welcher wider kame/ mit sieben arglistigern gaysten. Darumb alle/ die/ ablas dartzu brauchen. das sie durch eynigen weeg oder weyse/ solche wesen/ itzt angetzeyt geringer machen/ die selbe furen den menschen in alte vnd new sund.

Dises wesen ist nit anders/ dan zu kere in got. vnd abkerung von sunden/ Dise fruchtbare wort/ begreyffen vil fruchten/ wie auch solige fruchten vnd gaben gottis geschehen/ ist vns durch gottlich wort/ ym xviii. capitel Ezechiel. eroffnet alßo.

Vngütigkeit des vngerechten/ sol vber ym sein/ ßo aber der vngerecht auß thuet/ vnd berewet alle sein sunde/ die er gethan/ vnd bewaret alle mein gebott/ vnd macht dz vrteyl vnd gerechtigkeit ßo wirt er ym leben bleyben/ vnd nit sterben. Alle seyne bößheiten die er gewircket. werde ich vorgessen vnd nit gedencken.

Diße schrift ist clar vnd licht/ vnd leychtlich zu lernen/ erstlich spricht gott/ das der vngutig vnd vngehorsam in seyner schackeit ersterben soll/ ewiglich straff darumb zu leyden. Darnach leret vns die schrift/ wie sich/ vnd welcher massen der sunder von sunden abkeret/ nemliich. ßo er auß thut/ soll er alle sein sunde berewen/ vnd alles sein vbel betrawren alßo.

Du solt sunden mit scharffen vnd hitzigen gedancken suchen vnd vorurteilen/ dan wie woll dem menschen vnmüglich ist/ sein hertz außzulernen/ als Hiere. im .xvii. capi. sagt. Des menschen hertz ist böß vnd vnergrundlich keyner kan sein böß hertz/ gar auß lernen/ eher du dich bedenckst/ so hat dirs ettwas vbels geboren. Dan wie woll es vnmüglich ist/ das der mensche alle seyne sunde ersinne. doch sol er die mißtetten/ die er/ auß fursatz/ gethon mit grossem ernst vnd vleys/ fur sein gestreng gericht vnd vrteyl tragen/ die mit seufftzen/ leyd/ widerwillen/ vordrieß vnd leyden beweynen/ also kerest du von den sunden. wie Dauid der spricht im ps. 50. Meyn sund ist stetz oder alletzeit wider mich. ist die sunde wider dich. ßo mustu widerumb die sund auch vor volgen vnd hassen.

Wan der mensch alßo von bößheyten abkeret/ ßo ist gott also barmhertzig/ das er/ nit mehr der sunden gedencken wil/ wie gott durch Esaiaim im 43. cap. geschrieben. Gedenck du deyner sunde/ ßo wil ich yr nit gedencken. Ja in dem nun/ wan der sunder spricht/ ich wil meyn sunde/ wider mich bekennen/ als baldt. vor gibt ym gott die sunde/ dz hat gott (wie itzt gehort) durch

Esa. vorheyschen/ vnd Daudid bekant ym 31. ps. sagende. Ich hab gesprochen/ ich werde meyn bößheit/ wider mich beychten/ vnd du hast meyn sund vorlassen. Der heylic sant Joannes schreybt also. Got ist getrew vnd gerecht sunde zuuorgeben/ so wir sie bekennen. Nu steet offentlich geschriben/ das got die sunde vorgibt vnd gedenckt ir auch nit mehr/ wan sie der mensch gedenckt/ wie dan auch Ezechielis ym .33. cappit. geschrieben.

Wie magk es dan gesein/ das die kirchen/ oder prelaten/ der bereutsen sunde gedencken durffe.

Ich waiß/ das offentlich sunde/ offentlich straff haben/ aber ich wolte gern/ durch schrift lernen/ weyl alle ablaßbrief/ rew vnd led der sunden/ wie ein grund beuor fodern/ warumb die Monichen/ erdacht haben/ das die prelaten/ der sunde gedencken die got vorgessen hat/ heyst nit das aufferden bynden/ das got in hymeln auffgelöst. Item das/ hie straffen vnd gedencken/ das gott dorf vorgeben vnd vorgessen hat? Es sey ßo gut vnd schön als ymer gesein kan/ das man heymliche sunde mit solchen straffen/ wie mit saltz/ einsaltz/ dennoch weer seer gutt/ ya vill besser/ das man sich solcher burden messiget/ vnd betrachtet/ das Cristus sagt. Wee euch/ yr belestiget die menschen/ mitt vntreglichen burden/ die yr selber nit anruret.

Nu las ich woll gescheen/ das man heymlich sunde einsaltze mit zeytlichen straffen/ die ablas abnympt. Ich weyß aber nit, was ich sagen soll zu dem wort gottis. Esaia. am xxix. capitell. Sie haben mich geförcht mit menschen geboten vnd leren.

Gott will sich nit loben lassen/ oder das yn der mensch, mit menschen gesetzen forchte/ dan gott vorachtet vnser geetze/ ya er vorderbt aller weyßen kunst/ vnd saget vrsachen/ das menschen gesetzen/ allein augen vnd maull erfüllen/ aber das hertz/ machen sie gott fern/ vnd fromm von got/ wie in gemeltem capitel Esaie steet. Appropinquat popul iste ore suo et labiis suis glorificate me/ cor autt longe est a me/ er timuerunt me mandato et doctrinis hominum re.

Es ist got auch schimpflich/ das er ein vngenugsam gesetz vnd leer geben hett/ wan vns nit alles/ das wir thun sollen/ in seynem gesetz angetzeygt wer.

Beschließlich ich bitt bruder Seylern er wol Esaiam vnd andere propheten wol ansehen/ vnd wol mich/ durch heilige schrift vorstendigen/ das etwas

von den beychtuettern/ den beychtkyndern auff zu legen sey/ das ablas vor-
gebe.

Wirt er aber kein schriffte bringen/ so mag ich nichts von dem ablas halden.
Man kan mir auch kein Ban/ derwegen/ auff den halß werfen. Kan auch sa-
gen/ ablas ist auß menschen gedencken entsprossen/ hüt dich vor den ees-
ten. Das sag ich alles on freuel/ dan ich beger zu lernen/ das ich nit yrre mit
ablas.

Das ist von der abkerung von sunden gesagt/ das gott nie gedenckt der sun-
de/ die der mensch neydet vnd hasset/ vnd vorfolge das ist die er berewet.
Vollgende wollen wir von der zukerung reden/ wie sich der sunder an gott
keret/ vnd in welcher massen/ in gott klebet/ vnd ym anhengig bleyb.

In dem xviiij. cap. Ezechiel. Hab ich ein schriffte oben ertzelt/ diß lauts. So
der vngütig/ alle sein sunden berewet/ vnd bewart alle meyn gebott/ vnd
vbet sich in dem vrteyl vnd gerechtigkeit/ ßo wil ich keyner mißtat/ keynes
vbelss gedencken. Diß ist ein tröstliche gottis zusag/ da durch warhafftig
zucker angetzeyget ist/ vnd lauter gesagt/ was/ nach vorgebung der sunde/
der sunder thuen vnd wircken sol.

Gott furet den sunder/ nit zu menschen gesetzen/ sonder in sein gotliche ge-
bot vnd vorheyschung/ er spricht/ wan der sunder alle meyn gebot behüet/
vnd thuet dz vrteyl vnd gerechtigkeit/ darumb ist es gar nicht von nöten/ der
absolürt beychtsön/ sich an menschen gebot vnd trost keer/ wie gut sie
ymer sein mugen/ dan got libet/ das er machet/ vnd zeucht vns an sein wort
vnd voracht vnser gesetz. Sol nu der mensch alle gebot bewaren/ so muß er
sie wol lernen/ wann er dan begert/ die gebot/ des leben zu wissen/ spricht
Christus/ du sagst welche gebot/ zu dem rechten leben weysen/ ich frage
dich/ wz ist ym gesetz geschrieben/ also furet got den menschen in gotlich
gebot/ darumb ist von nöten/ dz sich der sunder/ mit höchstem vleys/ auff
die schriffte leeg/ vnd hencke sich festiglich an gotliche zusagung vnd geen
in allen geboten gottis/ er muß dz kreutz Christi/ daryn alle gebott vnd
weyßheyte/ ßo zum leben dienen/ behalten sein/ auff sich nemen/ vnd seynen
willen/ auß dem creutz schopffen.

Der sunder lernet in der schriffte/ wie er sich neyden vnd hassen/ wie er sich
vorleuchnen soll/ wie er dz creutz teglich tragen/ vnd Christo nachfolgen
sol/ wie in dem menschen nichts gutes/ eytel vorlust/ vnd alles gute/ vnd al-
le hülff/ voon got gnediglich abfleusset. Alßo kumpt er in ein gerecht war-

hafftig vrteyl vnd gerechtickeit/ vnd also driet er/ in diser weyß/ in alle gebott gottis/ vnd in eusserliche vnd ynnerliche weerck/ er macht ym nit eygen gesetzte/ sonder er betracht/ wie er augenplich vnd zu allen zeyten/ gottlichen willen/ annem vnd erfull/ der dan manichfeltige in allen augenplichen fuffelt.

Etwan ruffet er gott ann/ etwan lobet er gott als seynen erlöser/ etwan bekennet er gottis gerechtickeit in widerwertickeit/ sprechende. Du bist der gerecht gott/ vnd hast alles wee vnd vbel/ in deynem gerechten vrteyl vber vns gefurt/ dir sey glorien vnd lob/ vns schandt vnd spott. Dartzu hatt er/ lib/ trost/ glauben/ vnd hoffnung zu got. Er hüttet sich vor argwenickeit/ er vrteylt keynen zu dez argsten/ aber sich vrteylet er mit ernst. Also ist er gerecht bey sich/ vnd dem nechsten.

Zeyten steet er bey den weisen vnd widwen. Zeyten kleydet er die blossen. Zeyten speyset er die hungerigen. Zeyten besucht er die gefangen. Zeyten fast er/ was ym ungluck fuffelt. Zeytet betet er/ alles nach gelegenheit und erforderung der zeyten/ stellen vnd personen. Dise werck wachsen auß dem edelen bawme/ auß dem creutz Christi/ dz ein yglicher alle tag tragen soll/ das Creutz soll niemants vmb gelt aber ablas ablegen. Ist aber eyner/ der sprechen darff/ das creutz magstu mit ablas mindern/ der ist gewißlich eyn spottischer Jud/ vor dem creutz Christi steende vnd sprechende. Bistu ein sohn gottis/ so steyg vom creutz/ aber lieber gesel welcher absteyget/ der kumpt auß dem gebott gottis/ vorleust vrteyll vnd gerechtickeit vnd vordirbt ewiglich.

Endlich muß der bußwircker ein vnderscheyt zwüschen den geboten gottis haben/ bewegen/ das Christus zu dem gleyßner sagt Mat. 23. We euch phariseyern/ ir gebent den zehen/ von anet vnd eylh vnd hynderlassen/ die groste ding/ des gesetzes. nemlich/ das vrteyl (von dem ich in der außlegung eynes wagens geschrieben) vnd barmhertzigkeit/ lib vnd glauben. Man muß auch gewarnemen ob dich gott mit grossen oder cleynen wercken besucht/ dz man nit dem geringe oblige/ vnd nachlaß das groste vnd mehrer. Es ist ein loblich werck geste freuntlich handeln/ aber vil loblicher ist das wort gottis geystlich zu hören. Nachdem/ wir auß dem Euangelio leßen/ das Christus gesgt Maria hatt den besten teyl erwelt/ der sol nit von yr genommen werdne. Maria saeß bey den füßen Christi vnd horet seyn wort. Martha die was sorgfeldig/ bereyt feur/ vnd kuchen/ speyß vnd gedrenck/ domit sie den hern neren wolt/ das was ein gut werck aber do sie Mariam yr schwes-

ter/ von zu horung vnd lernung des wort gottis abtziehen wolt/ sprach Christus. Maria hatt ein besser teyl erwelt/ darumb sol sie nit verhindert werden/ aber/ das groß nachlassen/ vnd das klein volbringen. Das ist dohin geredt das ein yglicher Christ vleyßsig lernen soll/ der gebott vnd werck gottis vnterscheidt/ vnd so yne got in grosse gebot bringt sol er nit/ auß aygez willen/ abfallen/ vff dez cleyenen nachfolgen/ dan die grosse werck musen gescheen/ vnd cleyne sollen nit nachbleyben/ ßo die grosse volendet sein. Paulus spricht er wol vill lieber funff/ aber etzliche wort/ ym vorstandt/ vnd geyst/ in der kirchen sagen/ oder beten/ dan funffhundert vorsickel an vorstendnis leßen/ wie dan vil monch thuen/ die den psalter wie die nun singen. Begibt sichs dan/ das ich etwar in ein erkenntnis/ eynes psalmes oder geschriff kum/ dem sol ich zuuor nach suchen/ vnd meyn lang pfaffen gebeet aufftzihen. Weyl vns nu got/ zu den grossen gebott/ vor allen/ vorpflichtiget/ vnd am tag ist/ das gottis gebott mehr vnd grosser seynt/ dan menschen gesetz/ ßo soll vns ye/ kein menschlich trost oder vorheyschung von gotlichen geboten/ vorhyndern/ wie magk mir dan ablas/ fasten oder beten/ dartzu mich gott/ durch vorfolgung/ reytzet vnd furet abnemen. Derhalben ist abermals mein begerung/ bruder Seyler/ wölle mich durch die schriff/ leren/ dz ablas de iure diuino sein/ das ist/ in der schriff gegrundt/ die weyl nicht bleybt ym sunder dem gott sunde vorgeben hatt/ dan das der vorgebung wesentlich eingeleybt ist/ vnd zu dem gott vorpflichtet/ vnd an welches kein außtilgung/ der sunden/ geschicht. Wo aber der Seyler ein menschen strick mir furwerffen wil/ ßo werde ich sagen/ ich byn ein Christ/ vnd frag dich von gottlichem willen/ ob got ablas ye hatt wollen haben/ das soltu auß der schriff/ dar in gottlicher wil scheynet/ vnderweyßen.

Diß hab ich kurtzlich vmb vrsachen/ oben vormeldet/ gezweyffelt von dem ablas/ vnd dich erynnert/ als eynen/ der die Biblien tag vnd nacht frisset/ vnd außbillet/ Wiewol ich dich nit ßo gelart acht/ als köndestu diser sach gnug thun/ dennoch voracht ich nit die grohen flöhe/ die weysse sschild auff ym rüch furen/ du hast zu sampt etzlichen deynen brüdern/ mich vnd die glidmas dißer viuerstett als falschen vnd new Wittenbergische propheten/ offentlich gescholten/ nun aber weyß/ dz durch schriff vnd gibt mir nit holtzschuge fur haselhünner/ nym alle deynn hotzschug brüder zu hilff/ vnd helfferß helffer/ vnd leer mich/ das der ablas/ in der schriff bewert ist. Du würest mich villeycht mit etzlichen historien anfallen/ als mit der/ von Ezechias. 2. Paral. 32. Vber den gottis zorn nit kam im leben/ vnd der von Dauid. 2. Reg. 2. das gott Dauid/ sein sunde vorgab/ vnd sterbet doch seynen son/

Auß gemelten historien/ brechen etzlich ein kunstlich behelffred/ vnd sprechen/ dz etwas ym sunder bleib/ als ein straff/ die der mensch leyden muß/ nach erlangter vorgebung der sunde/ vnd sagen das solch bleybende straff/ durch den ablas abgekaufft magk werden. Weyl aber yr schutz wort dunckel ist/ vnd noch nit den ablas beweeret/ wil ich warten wz Bruder Seyler/ darauß flechten kan/ den ich bitt/ er wöl bald hilff suchen/ vnd antworten/ damit ich etwas von ym erlernen mug/ dan ich erbiet mich den ablas groß zu machen/ ßo er in der schrift getzeygt würd/ wo aber ich alßo vngelert bleyb/ kan man/ mir einfeltigen nit vorweysen vnd vorkeren/ so ich sagen würt/ ich meyn/ das ablas ein erticht dinck sein/ damit die lewt von gelt vnd guten wercken/ in ein boße meynung vorleydet werden/ das ich nit reden wil/ so ich erbarlich gelernet werde/ itzt zu guter nacht/ ich wil dir wasser vnd saltz schicken. Datum eylig Wittenbergk Laurencii. Im. xx. iar.

Ich wil hiemit die andere Brüder parfußer ordens/ dere sehr vil/ vast woll/ sich in die heylige schrift legen/ nit angegriffen hab/ in sunder/ die/ den holtzschugern in geberden vngleich seynt wollen sie aber mich ye haben/ alhie bin ich. Finis.

Gedruckt zu Wittenbergk durch Johan Grunenberg. 1520.

Quellen:

Sämtliche Texte sind der [Glaubensstimme](#) entnommen. Hier sind zumeist auch die Quellangaben zu finden.

Die Bücher der Glaubensstimme werden kostenlos herausgegeben und dürfen kostenlos weitergegeben werden.

Diese Bücher sind nicht für den Verkauf, sondern für die kostenlose Weitergabe gedacht. Es kommt jedoch immer wieder zu Fragen, ob und wie man die Arbeit der Glaubensstimme finanziell unterstützen kann. Glücklicherweise bin ich in der Situation, dass ich durch meine Arbeit finanziell unabhängig bin. Daher bitte ich darum, Spenden an die **Deutsche Missionsgesellschaft** zu senden. Wenn Ihr mir noch einen persönlichen Gefallen tun wollt, schreibt als Verwendungszweck „Arbeit Gerald Haupt“ dabei – Gerald ist ein Schulkamerad von mir gewesen und arbeitet als Missionar in Spanien.

Spendenkonto: **IBAN:** DE02 6729 2200 0000 2692 04,
BIC: GENODE61WIE

Alternativ bitte ich darum, **die Arbeit der Landeskirchlichen Gemeinschaft Schlossplatz 9 in Schwetzingen zu unterstützen.** Die Landeskirchliche Gemeinschaft „Schlossplatz 9 in Schwetzingen ist eine evangelische Gemeinde und gehört zum Südwestdeutschen Gemeinschaftsverband e. V. (SGV) mit Sitz in Neustadt/Weinstraße. Der SGV ist ein freies Werk innerhalb der Evangelischen Landeskirche. Ich gehöre dieser Gemeinschaft nicht selber an, und es gibt auch keinen Zusammenhang zwischen der Gemeinde und der Glaubensstimme, doch weiß ich mich ihr im selben Glauben verbunden.

LANDESKIRCHLICHE GEMEINSCHAFT „SCHLOSSPLATZ 9“ 68723
SCHWETZINGEN

Gemeinschaftspastor: M. Störmer, Mannheimer Str. 76,
68723 Schwetzingen,

IBAN: DE62 5206 0410 0007 0022 89
Evangelische Bank eG, Kassel

Andreas Janssen
Im Kreuzgewann 4

69181 Leimen

Natürlich suche ich immer noch Leute, die Zeit und Lust haben, mitzuarbeiten - wer also Interesse hat, melde sich bitte. Meine Email-Adresse ist: webmaster@glaubensstimme.de. Insbesondere suche ich Leute, die Texte abschreiben möchten, bestehende Texte korrigieren oder sprachlich überarbeiten möchten oder die Programmierkenntnisse haben und das Design der Glaubensstimme verschönern können.

Table of Contents

Vorwort

Bodenstein, Andreas - Von vormugen des Ablas.

Quellen:

Inhaltsverzeichnis

Vorwort	1
Bodenstein, Andreas - Von vormugen des Ablas.	2
Quellen:	15
Table of Contents	17